

摘藻堂四庫全書薈要

子部

欽定四庫全書薈要卷一萬一千六百八十四

子部

御定淵鑑類函卷二百三十六

邊塞部七

原西戎總序

增姑羌

原樓蘭

杆彌

車師

增高昌

火州

土魯番

柳陳

黑婁

滑國

白題

西戎總序一

原杜氏通典曰西域漢孝武時始通本三十六國皆在
匈奴之西烏孫之南南北有大山中央有河東西六千
餘里東則接漢阨以玉門陽關西則限以葱嶺諸國大

率土著有城郭田畜與匈奴烏孫異俗故皆役屬匈奴
西邊日逐王領西域賦稅取足焉其南山東出金城與
漢南山屬焉自玉門陽關出西域有兩道從鄯善傍南
山北陂河西行

循河曰陂史記曰陂山東道

至莎車為南道西踰葱

嶺則出大月氏安息自車師前王庭隨北山陂河西行
至疏勒為北道西踰葱嶺則出大宛康居奄蔡焉耆自
張騫開西域之迹其後霍去病擊破匈奴右地降渾邪
休屠王

屠音除

遂空其地始築令居以西

今音鈴縣名

初置酒

泉郡後稍發徙人充實之分置武威張掖燉煌列四郡

據兩關焉自李廣利伐大宛之後西域震懼多遣使來

貢獻於是東自燉煌西至鹽澤往往起亭障是時軍旅

連出師行二三十年海內虛耗征和中貳師李廣利以

軍降匈奴帝既悔遠征伐而搜粟都尉桑弘羊與丞相

御史奏言故輪臺以東捷枝渠犂皆故國地

輪臺渠犂地名

廣

饒水草有溉田五千頃以上處溫和田美可益通溝渠

種五穀與中國同時熟田一歲有積穀募民壯健有累

重敢徙者詣田所就畜積為本業益墾溉田稍築列亭

連城而西以威西國帝深陳既往之悔乃下詔曰前有

司奏欲益民賦三十助邊用

每口增三十錢

是重困老弱孤獨

也而今又請遣卒田輪臺輪臺西於車師千餘里前開

陵侯擊車師時

開陵侯匈奴介和王來降者也

危須尉犁樓蘭六國皆

發畜食迎漢軍又自發兵凡數萬人王各自將共圍車

師降其王諸國兵便罷力不能復至道上食漢軍漢軍

破城食至多然士自載不足以竟師强者盡食畜產羸

者道死數千人朕發酒泉驢橐駝負食出玉門迎軍吏

卒起張掖不甚遠然尚廝留甚衆

廝留言是前後雜列不相及逮

曩者

朕之不明以軍候弘上書言匈奴縛馬足置城下馳言

秦人我乞若馬

謂中國人為秦人習故言也乞若猶言乞汝乞音氣

又漢使者久

留不還故遣貳師將軍欲以為使者威重也古者卿大

夫與謀參以蓍龜不吉不行乃者丞相御史二千石諸

大夫郎為文學者皆言祥善而易之卦得大過爻在九

五

其辭曰枯楊生華何可久也謂匈奴破不久

匈奴困敗公車方士太史理

星占氣及太卜龜著皆以為吉匈奴必破時不可得也

卦諸將貳師最吉故朕親發貳師今謀卦兆皆反繆失

一狼走千羊乃者貳師敗軍士死略離散悲痛常在朕

心今請遠田輪臺欲起亭隧是擾勞天下非所以優民

也朕不忍聞且匈奴得漢降者常提掖搜索問以所聞

搜索者恐其
或私齎文書

今邊塞未正闌出不禁障候長吏使卒獵

獸以皮肉為利卒苦而烽火乏失亦上集不得後降者

來若捕生口虜乃知之當今務在禁苛暴止擅賦力本

農修馬復令

因養馬以
免徭賦也

以補缺無乏武備而已郡國二

千石各上進畜馬方略補邊狀與計對由是不復出軍
而封丞相車千秋為富民侯以明休息思富養民也昭
帝時乃用桑弘羊前議以給使外國者至宣帝遣衛司
馬使護鄯善以西數國及破姑師未盡殄分以為車師
前後王及山北六國時漢獨護南道未能盡并北道也
神雀三年匈奴日逐王來降護鄯善以西使者鄭吉迎
之乃因使吉并護北道故號曰都護都護之起自古置

矣由此匈奴益弱不得近西域於是徙屯田於北胥鞬

披莎車之地

鞬居言反披分也

屯田校尉始屬都護都護督察

烏孫康居諸外國都護理烏壘城去陽關二千七百四

十里與渠犂田官相近土地肥饒於西域為中故理焉

至元帝復戊巳二校尉屯田於車師前王庭

戊巳中央鎮覆四方

又開渠播種以為厭勝故稱戊巳焉

哀平間自相分割為五十五國凡國

自譯長城長君監吏大祿伯長千長都尉且

子餘反

渠當

戶將相至侯王皆佩漢印綬凡三百七十六人而康居

大月氏安息罽賓烏弋之屬皆以絕遠不在數中其來
貢獻則與相報不督錄總領也至王莽時四邊擾亂與
中國遂絕並復役屬匈奴前往西域有二道自元始以
後有三道從玉門關出經婁羌婁而遮反轉西越葱嶺經懸
度入大月氏為南道從玉門關西出發都護并迴三隴
沙北頭經居盧倉從沙西北過龍堆到故樓蘭轉西詣
龜茲至葱嶺為中道從玉門關西北出經橫坑辟三隴
沙及龍堆出五船皆到車師界戊己校尉所理高昌轉

西與中道合龜茲新道後漢永平中匈奴乃脇諸國共
寇河西郡縣城門晝閉明帝乃命將北征匈奴取吾盧
地置宜禾都尉以屯田遂通西域于闐諸國西域自絕
六十五載乃復通焉明年始復置都護戊己校尉章帝
時焉耆龜茲攻沒都護陳睦匈奴車師圖戊己校尉章
帝不欲疲敝中國以事邊境乃迎還戊己校尉不復遣
都護罷屯田匈奴因遣兵守伊吾地時軍司馬班超留
于閼綏集諸國和帝永元初竇憲大破匈奴因遣副校

尉閭槃掩擊伊吾破之三年班超遂定西域因以超為都護居龜茲復置戊己校尉於是五十餘國悉納質內屬其條支安息諸國至於海濱四萬里外皆重譯貢獻九年班超遣掾甘英窮臨西海而還皆前代所不至莫不備其風土傳其珍怪焉及班被徵以任尚為都護尚謂超曰猥承君後宜以誨之超曰塞外吏士本非孝子順孫皆罪過徙補邊屯難養易敗今君性嚴急水清無大魚察政不得下和宜蕩佚簡易寬小過總大綱而已

超去後尚私謂所親曰我以班君當有奇策今所言平
平耳尚至數年安帝初西域背叛頻攻圍都護任尚段
禧等朝廷以其險遠難相應赴詔罷都護由此遂棄西
域北匈奴即復收屬諸國共為邊寇十餘歲燉煌太守
曹宗請出兵擊匈奴復欲進取西域鄧太后不許但令
置護西域副校尉居燉煌羈縻而已其後匈奴連與車
師入寇河西漢不能禁議者因欲閉玉門陽關以絕其
患尚書陳忠上疏以為燉煌宜置校尉按舊增四郡屯

兵以西撫諸國庶足折衝萬里震怖匈奴太后又召班超之子勇問之勇議曰昔者孝武皇帝患匈奴強盛開通西域諸論者以為奪匈奴府藏斷其右臂遭王莽篡位徵求無厭遂以背叛光武中興未遑外事故匈奴負強驅率諸國及至永平再攻燉煌河西城門晝閉明帝命武臣出征西域故匈奴遠遁邊境得安及至永元莫不內屬會間者羌亂西域復絕匈奴遂遣責諸國備其逋租高其價直嚴以期會鄯善車師皆懷忿怨思樂事

漢其路無從前所以時有叛者皆由牧養失宜還為其害舊燉煌郡有營兵三百人宜復之復置護西域副校尉居於燉煌如永元故事又宜遣西域長史將五百人屯樓蘭西當焉耆龜茲徑路南強鄯善于閼心膽北捍匈奴東近燉煌如此誠便於是從忠勇議乃以勇為西域長史將五百人西屯柳中勇遂破平車師自建武至於延光西域三絕復通順帝永建二年勇復擊降焉耆於是龜茲疎勒于閼莎車等十七國皆來服從而烏孫

葱嶺以西遂絕六年帝以伊吾舊膏腴之地傍近西域
匈奴資之以為鈔暴復令開設屯田如永元時事置伊
吾司馬一人自陽嘉以後朝威稍損諸國驕放轉相陵
伐矣自魏及晉中原多故西域朝貢不過三數國焉至
後魏太武帝使董琬使西域還具言其地為三域自葱
嶺以東流沙以西為一域姑墨以南月氏以北為一域
兩海之間水澤以南為一域三域之內諸小渠長蓋以
百數其出西域更為四道自玉門流沙西行二千里至

鄯善為一道自玉門度流沙北行二千二百里至車師
為一道從莎車西行一百里至葱嶺西千三百里至伽
倍為一道自莎車西南五百里至葱嶺西南千三百里
至波路為一道焉於是貢獻者十有六國孝文延興中
尚書奏以燉煌一鎮界遠西北寇賊路衝慮或不固欲
移就涼州羣官會議給事中韓秀曰此蹙國之事非闢
土之宜愚謂燉煌之立其來久矣雖土鄰強寇而兵人
素習縱有姦竊不能為害若徙就姑臧慮人懷異意或

貪留重遷情不願徙引寇內侵深為國患且燉煌去涼
州三千里捨遠就近防制有闕一朝廢置是啟戎心恐
醜徒協契侵竊涼土邊役繁興艱難方甚乃從秀議隋
煬帝時遣侍御史韋節司隸從事杜行滿使於西蕃諸
國至罽賓得瑪瑙杯王舍城得佛經史國得十舞女獅
子皮火鼠毛而還帝復令裴矩於武威張掖間往來以
引致之皆啗以厚利令轉相諷諭大業中相率而來朝
者三十餘國帝因置西戎校尉以應接之自燉煌西出

玉門關涉鄯善北通伊吾千里自伊吾北通車師前部
高昌辟千二百里自高昌辟北通車師後部金滿城五
百里此其西域之門戶也故漢戍已校尉更互屯焉伊
吾地宜五穀桑麻蒲萄其北又有柳中皆膏腴之地故
漢常與匈奴爭車師伊吾以制西域至隋有商胡雜居
勝兵千餘人附於鐵勒人甚驕悍厥田良沃隋末內屬
置伊吾郡後又臣突厥唐貞觀四年以頡利破滅遂舉
其屬七城來降因列其地為西伊州同於編戶至武太

后如意初武威軍總管王孝傑大破吐蕃復龜茲于闐
疎勒碎葉四鎮自是諸國朝貢侔於前代矣 增續文
獻通考曰明於西北邊設立甘肅等衛自肅州西七十
里為嘉峪關關外建七衛而哈密在六衛西去肅州不
一千五百里本古伊吾盧之地唐之伊州也其北天山
與威喇界西接火州回回韃靼雜居為往來之津其主
曰思克特穆爾洪武中太祖定陝西命將守嘉峪關永
樂二年諸番遣使貢馬始即其地設哈密赤斤罕東阿

端曲先安定諸衛改封恩克特穆爾為忠順王王卒無

嗣兄子托克托賜以金印玉帶襲主國事令察諸番向背

凡番使入貢就此譯遣亦斷匈奴右臂意也部下有回

回輝和爾哈喇輝三種托克托子博囉特穆爾成化八年

被其下殺其母諾衮達喇理國事九年土魯番

即唐之吐蕃夷蘇

勒坦阿里王入哈密劫王母奪金印部落遂播遷匿苦

峪城或附居肅州亦有隨土魯番去者事聞朝廷命高

陽伯李文右通政劉文往撫比至土魯番去遠王母金

印竟不返自是阿里謂中國易與志頗驕橫阿里王死
子阿哈穆特稱蘇勒坦未定時王母外孫輝和爾之種
都督罕慎寄寓肅州甘肅守臣以聞詔歸罕慎襲王爵
送入哈密城弘治初阿哈穆特謂罕慎非托克托族不
當嗣誘而殺之未敢顯言據哈密遣使入貢言罕慎病
死且乞封時兵部尚書馬文升議阿哈穆特擅求代王
主哈密宜降璽書切責朝廷從之王母故其渠伊蘭以
金印城池來歸下兵部議會曲先安定王遣使入朝偽

稱忠順王裔遂命詢貢使安定王族誰可主哈密事者
舉王姪善巴對詔送善巴入哈密嗣忠順王阿哈穆特
聞之怒遂擄善巴及金印而去時弘治癸丑額森阿哈
穆特遣舍音莽蘇兒等入貢至是命兵部侍郎張海等
領貢使往經略之海等至遣哈密人以敕往諭不報
海以上命修嘉峪關閉關絕西域諸番貢令彼結怨阿
哈穆特以攜其黨阿哈穆特復入哈密自稱可汗大掠
罕東諸夷已而西去令頭目伊蘭率番人二百餘據哈

密馬文升曰若專示以恩而不加之以威彼終不知畏須
用漢陳湯故事懲之請於上敕巡撫許進總兵劉寧彭清
等帥師由南山捷徑冒險而入阿哈穆特聞大兵至先率
衆遁惟留伊蘭與色特爾領蕃兵數百人登臺自保進至
僅斬首六十餘級而還久之阿哈穆特以閉關不得通貢
貿易遣使送善巴及金印來歸仍封忠順王善巴死子蘇
勒坦拜雅濟嗣為屬夷所逐走土魯番阿哈穆特死子蘇
勒坦莽蘇爾立遣和卓塔濟迪音等入哈密取金印明

年莽蘇爾亦至哈密又寇甘肅索幣且挾以許我即獻城及金印已而遣使歸城印而留蘇勒坦拜雅濟不遣已復遣人據哈密來請幣副使陳九疇調屬夷劫其老營遣人北結威喇擣其巢穴破三城始懼引退嘉靖七年劫我曲先衛人雅穆拉內侵雅穆拉不從遂擁帳內徙奔肅州乞白城山金塔寺駐牧因留肅州莽蘇爾請以哈密易雅穆拉兵部尚書胡世寧曰雅穆拉反正歸順非納叛比而土魯番欲甘心雅穆拉以攜貳我屬夷正宜厚雅穆拉以風蠻

夷遂留不遣初世寧建議忠順王蘇勒坦拜雅濟已歸土
魯番雖還哈密亦其屬夷縱使今日有忠順嫡派應立
之人朝廷與之金印助之兵糧誰與為守不過一二年
復為所據奪不如閉嘉峪關置哈密不問不必再辱王
命詰城印以中彼索求之計如彼不肆侵擾則許其通
貢或復為寇閉絕之庶不以哈密故疲吾中國之奔命
也至是尚書桂萼議哈密勢雖不可興復亦不可廢棄
并條甘肅邊事數款上之制曰可遂不用兵哈密是時

來降人哈喇婁言番酋欲以哈密城與都督穆爾瑪哈穆特管理兵部遂請於上許其通貢著為令以三年或五年為期夷使雖多入京止許十二人餘留塞自是哈密入土魯番據矣

西戎總序二

原論漢班固西戎論曰孝武之代圖制匈奴患其兼從西國結黨南羌乃表河西列四郡開玉門通西域以斷匈奴右臂隔絕南羌月氏單于失援自是遠遁而幕南

無王庭因文景玄默養民五代天下殷富財力有餘士
馬強盛故能睹犀布璫瑁則建珠崖七郡感蒟醬竹杖
則開牂牁越窩聞天馬蒲萄則通大宛自是之後萬里
相奉師旅之費不可勝計至於用度不足乃權酒酤莞
鹽鐵鑄白金造皮幣算至車船租及六畜民力屈財用
竭羣盜並起至於末年遂棄輪臺之地而下哀痛之詔
豈非仁聖之所悔哉且西域近有龍堆遠則葱嶺身熱
頭痛懸度之阨淮南杜欽揚雄之論皆以為此天地所

以界別區域絕外內也書云西戎即序禹就而序之非
上威服致其貢物也西域諸國各有君長兵衆分弱無
所統一雖屬匈奴不相親附匈奴能得其馬畜旃罽而
不能統率與之進退與漢隔絕道里又遠得之不為益
棄之不為損盛德在我無取於彼故自建武以來西域
思漢威德咸樂內屬惟其小邑鄯善車師界迫匈奴尚
為所拘而其大國莎車于闐之屬數遣使置質願請都
護聖上遠鑑古今因時之宜羈縻不絕辭而未許雖大

禹之序西戎周公之讓白雉太宗之却走馬義兼之矣
亦何以尚茲 增宋范煜西域傳論曰西域風土之載
前古未聞也漢世張騫懷致遠之略班超奮封侯之志
終能立功西遐羈服外域自兵威之所肅服財賂之所
懷誘莫不獻方竒納愛質露頂肘行東向而朝天子故
設戊己之官分任其事建都護之帥總領其權先馴則
賞贏金而賜龜綬後服則繫頭額而蒙北闕立屯田於
膏腴之野列郵置於要害之路馳命走驛不絕於時月

商胡販客日款於塞下其後甘英乃抵條支而歷安息
臨西海以望大秦拒玉門陽關者四萬餘里靡不周盡
焉若其境俗性智之優薄產載物類之區品川河領障
之基源氣節涼暑之通隔梯山棧谷繩行沙度之道身
熱首痛風災鬼難之域莫不備寫情形審求根實至於
佛道神化興自身毒而二漢方志莫有稱焉張騫但著
地多暑溼乘象而戰班勇雖列其奉浮圖不殺伐而精
文善法尊達之功靡所傳述余聞之後說也其國則殷

乎中土玉燭和氣靈聖之所降集賢懿之所挺生神迹
詭怪則理絕人區感驗明顯則事出天外而騫超無聞
者豈其道閉往運數開叔葉乎不然何証異之甚也漢
自楚英始盛齋戒之祀桓帝又修華蓋之飾將微義未
譯而但神明之邪詳其清心釋累之訓空有兼遺之宗
道書之流也且好仁惡殺蠲敵崇善所以賢達君子多
愛其法焉然好大不經竒譎無已雖鄒衍談天之辨莊
周蝸角之論尚未足以槩其萬一又精靈起滅因報相

尋若曉而昧者故通人多惑焉蓋導俗無方適物異會
取諸同歸措夫疑說則大道通矣

婁羗

增漢書曰出陽關自近者始曰婁羗國王號去胡來王
去陽關千八百里去長安六千三百里西接且末隨畜
逐水草不田作仰鄯善且末穀山有鐵自作兵兵有弓
矛服刀劍甲

樓蘭

原杜氏通典曰樓蘭在婼羌西北漢時通焉王理扞泥城去陽關千六百里東去長安六千一百里戶千五百七十西北去都護理所千八百五十里至山國千三百餘里

此國山居故名山國

西北至車師千九百里地沙鹵寄田仰

穀旁國人隨畜牧逐水草有驢馬多索駝能作兵器與婼羌同初漢武帝因張騫之言甘心欲通大宛諸國使者一歲中多至十餘輩樓蘭姑師當道苦之攻劫漢使王恢等漢將趙破奴率屬國騎及郡兵擊之虜樓蘭王

遂破姑師於是列亭障至玉門矣樓蘭既降服貢獻匈

奴間發兵擊之於是樓蘭遣一子質漢後貳師將軍擊

大宛便道引兵捕樓蘭王將詣闕簿責王對曰小國在

大國間不兩屬無以自安願徙國居於漢地上直其言

遣歸國樓蘭王死後王立樓蘭國最東垂近漢當白龍

堆乏水草常主發導負米擔糧送迎漢使又數為吏卒

所懲艾不便與漢通

艾讀曰久

後復為匈奴反間數遮漢使

昭帝遣平樂監傅介子往刺其王懸首北闕下乃立其

弟尉屠耆為王更名其國為鄯善王自請天子曰身在漢久今歸單弱而前王有子在恐為所拒國中有伊循城其地肥美願漢遣一將屯田積穀令臣得依其威重於是漢遣司馬一人吏士四十人田伊循以鎮撫之其後置都尉伊循官置始此矣

鄯善

增後魏書曰鄯善國都扞泥城古樓蘭國也去代七千六百里所都城方一里北即白龍堆路至太延初始遣

使來獻四年遣其弟素延耆入侍及世祖平涼州沮渠
牧健弟無諱走保燉煌無諱後謀渡流沙遣其弟安周
擊鄯善王比龍恐懼欲降會魏使者自天竺屬賓還俱
會鄯善勸比龍拒之安周不能尅退保東城後比龍懼
率衆西奔且末其世子乃應安周世祖發涼州兵討之
其王真達面縛出降詣京師拜交趾公賦役其人比之
郡縣

精絕

增漢書曰精絕國王治精絕城去長安八千八百二十里勝兵五百人北至都護治所二千七百二十三里南至戎盧國四日行地阨陁西通杆彌四百六十里

且末

原後魏書曰且末國漢時通焉王治且末城去長安六千八百里戶二百三十西北至都護理所二千二百里北接尉犂丁零東與白提西接波斯精絕南至小宛可三日行地多蒲萄諸果西北流沙數百里夏月有熱風

為行旅之患風之欲至老駝先知即鳴而聚立埋口鼻
於沙中人每以為候亦將氈蔽鼻口其風迅駛斯須過
盡若不防者必致危斃

杆彌

原杜氏通典曰杆彌漢時通焉王理杆彌城去長安九
千三百里戶三千三百東北至都護理所三千五百里
南與疎勒東北與龜茲西北與姑墨接西通于閼四百
里後漢改其國曰拘彌居寧彌城亦曰寧彌城國順帝

永建中爲于閼王放前破殺其王興陽嘉初燉煌太守徐由遣疎勒發兵擊破于閼遂更立拘彌王靈帝熹平中又爲于閼所破殺掠殄盡衆纔千口

車師

原杜氏通典曰車師前王後王並漢時通焉前王國一曰前部理交河城水分流繞城下故爲號去長安八千一百里戶千五百西南至都護理所千八百里西域長史及戊己校尉並理於此去燉煌十三日行後王國理

務塗谷

即今蒲城今北庭府蒲類縣也

去長安八千九百里戶六百西

南至都護理所千二百三十餘里北與匈奴接宣帝地

節二年遣侍郎鄭吉校尉司馬意將免刑罪人田渠犂

積穀欲以攻車師至秋收穀吉意發城障諸國兵共擊

車師攻交河城破之王尚在北石城未得會吉食盡歸

渠犂田秋收後更往攻石城王乃輕騎奔烏孫吉還田

渠犂及車師益積穀以安西國侵匈奴匈奴大臣皆曰

車師地肥美近匈奴使漢得之多田積穀必害我國不

可不爭也遣騎來擊吉吉將田士卒保車師城匈奴圍城數日乃解吉上書車師去渠犂千餘里間以山河北近匈奴漢兵在渠犂者勢不能相救願益田卒於是故車師太子軍宿在焉著著立以為王盡徙車師國人令居渠犂遂以車師故地與匈奴車師王得近漢田官與匈奴絕亦安樂親漢其後置戍已校尉屯田車師故地增北史曰後魏太武初遣使朝獻初沮渠無諱鳩集遺人破車師國貞君十一年車師王車夷落遣使琛進

薛直上書曰臣亡父僻處塞外仰慕天子威德遣使奉獻不空於歲天子降念賜遣甚厚及臣繼立亦不缺常貢天子垂矜亦不異前世敢緣至恩輒陳私懇臣國自無諱攻擊經今八歲人民饑荒無以存活賊今攻臣甚急臣不能自全遂捨國東奔三分免一即日已到焉耆東界思歸天闕幸垂賑救於是下詔撫慰之正平初遣子入侍自後每使朝貢不絕

高昌

增北史曰高昌者車師前王之地東西二百里南北五
百里四面多大山地勢高敞人庶昌盛因名高昌亦云
有漢時高昌壘故以為號東去長安四千九百里漢西
域長史及戊巳校尉並居於此晉以其地為高昌郡張
軌呂光沮渠蒙遜據河西皆置太守以統之 文獻通
考曰後魏文成帝末其地又為蠕蠕所并立闕伯周為
王孝文太和五年高車主阿伏至羅殺闕王立燉煌人
張孟明後孟明為國人所殺立馬儒為王以鞏顧禮麴

嘉為左右長史儒通使後魏請內屬人皆戀土不願東徙相與殺儒立嘉其都城周千八百四十步於坐室畫魯哀公問政孔子像國內有城十八置四十六鎮官有令尹交河公田地公皆其王子也文字同華夏有毛詩論語孝經歷代子史集置學官子弟以相教授地多石磧氣候溫暖與益州相似穀麥再熟宜蠶多五果有草名羊刺其上生蜜味甚佳赤鹽如朱白鹽如玉取以為枕貢之中國多蒲萄酒俗事天神兼信佛法又有草實

如繭中絲如細纊名白疊子國人織以為布交市用焉
國北有赤石山山北七十里
有貪汗山夏有積雪此山之北鐵勒界也
北史曰熙平中仍求內徙遣使朝貢

詔曰卿地隔關山境接荒漠頻請朝援徙國內遷雖來
誠可嘉於理未協何者彼之氓庶是漢魏遺黎自晉氏
不綱因難播越成家立國積世已久惡徙重遷人懷戀
舊今若動之恐異同之變爰在肘腋不得便如來表也
正光元年又遣使奉表自以邊遐不習典誥求借五經

諸史并請國子助教劉燮以為博士許之隋大業五年
嘉孫伯雅來朝因從擊高麗還尚宗室女華容公主

文獻通考曰唐貞觀中其王文泰與西突厥連結諸國
朝貢者路出高昌擁絕之太宗謂其使曰高昌朝貢脫
略我使至彼文泰云鷹飛於天雉竄於蒿猫遊於堂鼠
安於穴各得其所豈不快耶明年當發兵擊汝國十四
年拜侯君集為交河道大總管討之文泰謂左右曰曩
吾入朝見秦隴北城邑蕭條非有隋比今伐我兵多則

輸糧不逮若下三萬我能制之度磧疲鈍以逸待勞臥
收其弊耳及王師至悸駭無計發病死子智盛降乃以
其地為西州以交河城為交河縣始昌城為天山縣田
北城為柳中縣東鎮城為蒲昌縣高昌城為高昌縣初
西突厥遣其葉護屯兵於可汗浮圖城與高昌為影響
至是懼而來降以其地為庭州并置蒲類縣每歲調內
地更發千人鎮遏焉褚遂良諫曰高昌誅滅威動四夷
然自王師始征河西供役飛米轉芻十室九匱五年未

可復今又歲遣屯戍行李萬里去者資裝使自營辦賣
菽粟傾機杼道路死亡尚不可計所遣罪人始於犯法
終於惰業無益行陳復有亡命官司捕逮株蔓相牽有
如張掖酒泉塵飛烽舉豈得高昌一乘一卒及事乎必
發隴右河西耳然則河西為我腹心高昌他人手足也
何必耗中華事無用宜擇高昌可立者立之名首領悉
還本土長為藩翰中國不擾書奏不省魏氏傳國九世
百三十四年而亡北史曰先是其國童謠云高昌兵

馬如霜雪漢家兵馬如日月日月照霜雪回首自消滅
文泰使人捕其初唱者不能得 文獻通考曰安史之
亂其地陷沒復自為國語訛亦曰高敞然其地頗有回
鶻故亦謂之回鶻宋乾德三年西州回鶻可汗遣僧法
淵獻佛牙琉璃器琥珀盞太平興國六年其王始稱西
州外生師子王阿厮蘭漢遣都督麥索溫來獻五月遣
供奉官王延德等使高昌還敘其行程來上云初自夏
州歷玉亭鎮次歷黃羊平度沙磧無水行人皆載水凡

二日至都囉囉族漢使過者遺以財寶謂之打當次歷
第女喝子族族臨黃河以羊皮為囊吹氣實之浮於水
或以橐駝牽木棧而渡次歷茅女王子開道族行入六
窠砂深三尺馬不能行行者皆乘橐駝不育五穀砂
中生草名登相收之以食次歷樓子山無居人行砂磧
中以日為占旦則背日暮則向日日中則止夕行望月
亦如之歷臥梁劾特族地有都督山唐回鶻之地次歷
大蟲太子族族接契丹界人衣尚錦繡器用金銀馬乳

釀酒飲之亦醉次歷屋地因族蓋達于于越王子之子

次至達于于越王子族此九族達韃中尤尊者次歷拽
利王子族有合羅川唐回鶻公主所居之地城基尚在
有湯泉傳云契丹舊為回鶻牧牛回鶻徙甘州契丹達
韃遂各爭長攻戰次歷阿墩族經馬駿山望鄉嶺嶺上
石龕李陵題字處次歷格囉美源西方百川所會極望
無際鷗鷺鳬雁之類甚衆次至托邊城亦名李僕射城
城中首領號通天王次歷小石州次歷伊州州將陳氏

其先自唐開元二年領州凡數十世唐時詔敕尚在地
有野蠶生苦參上可為錦帛有羊尾重者三斤小者一
斤肉如熊白而甚美又有礪石剖之得賓鐵謂之喫鐵
石又生胡桐樹經雨即生胡桐律次歷益都次歷納職
城在大患鬼魅磧之東南望玉門關甚近無水草載糧
以行凡三日至鬼谷口避風驛用本俗法設祭出詔神
禦風風乃息凡八日至驛田寺高昌聞使至遣人來迎
次歷地名寶莊又歷六種乃至高昌高昌即西州也其

地南距于閬西南距大食波斯西距西天步露沙雪山
葱嶺皆數千里地無雨雪而極熱每盛夏居人皆穿地
為穴以處飛鳥羣萃河濱或起飛則為日氣所燠墜而
傷異屋宇覆以白堊開寶三年雨及五寸即廬舍多壞
有水出金嶺導之周繞國城以溉田園作水磴地產五
穀惟無蕎麥貴人食馬餘食羊及鳧雁樂多琵琶瑩篴
出貂鼠白氎繡文花氍布俗好騎射婦人戴油帽謂之
蘇幕遮用開皇七年歷以三月九日為寒食餘二社冬

至亦然以銀或鍤石為筒貯水激以相射或以水相潑
為戲謂之壓陽氣去病好遊賞行者必抱樂器佛寺五
十餘區皆唐朝所賜額寺中有大藏經唐韻玉篇經音
等居民春月多羣聚遨樂於其間遊者馬上持弓矢射
諸物謂之攘災有敕書樓藏唐太宗明皇御札詔敕緘
鎖甚固復有摩尼寺波斯僧各持其法佛經所謂外道
者也所統有南突厥北突厥大衆熨小衆熨樣磨割祿
黠憂司末蠻格哆族豫龍族之名甚衆國中無貧民絕

食者共賑之人多壽考率百餘歲時四月師子王避暑
於北庭以其舅阿多于越守國先遣人致意於延德曰
我王舅也使者拜我乎延德曰持朝命而來禮不當拜
復問曰見王拜乎延德曰禮亦不當拜阿多于越復數
日始相見然其禮頗恭師子王邀延德至其北庭歷交
河州凡六日至金嶺口寶貨所出又兩日至漢家寨又
五日上金嶺過嶺即多雨雪嶺上有龍堂刻石記云小
雪山也嶺上有積雪行人服毛罽度嶺一日至北庭總

高臺寺其王烹羊馬以具膳尤豐潔地多馬王及王后
太子各養馬牧放於平川中彌亘百餘里以毛色分別
為羣莫知其數北庭川長廣數千里鷹鷂鵟鵠之所生
多美草下生花砂鼠大如鸛鷖禽捕食之其王遣人來
言擇日以見使者願無訝其淹久至七日見其王及王
子侍者皆東向拜受賜旁有持磬者擊以節拜王聞磬
聲乃拜既而王之子女親屬皆出羅拜以受賜遂張樂
飲宴為優戲至暮明日泛舟於池中池四面作鼓樂又

明日遊佛寺曰應運泰寧之寺貞觀十四年造北庭北
山中出礪砂山中常有煙氣涌起而無雲霧至夕光焰
若炬火照見禽鼠皆赤采礪砂者著木底鞵若皮為底
者即焦下有穴生青泥出穴外即變為砂石土人取以
治皮城中多樓臺卉木白皙端正性工巧善治金銀
銅鐵為器及攻玉善馬直絹一匹其駑馬充食者纔直
一大貧者皆食肉西抵安西即唐之西境七月令延德
先還其國其王九月始至亦聞有契丹使來使缺唇以

銀葉蔽之謂其王云聞漢遣使入達靼而道出王境誘王窺邊宜早送至達靼無使久留因云高敞本漢土漢使來覘視封疆將有異圖王當察之延德偵知其語因謂王曰契丹素不順中國今乃反間我欲殺之王固勸乃止自六年五月離京七年四月至高昌所歷以詔賜諸番君長襲衣金帶繒帛八年春與其謝恩使凡百餘人復循舊路而還雍熙元年四月至京師延德初至達靼之境頗見晉末陷沒者子孫咸相率遮迎獻飲食問

其鄉里親戚意甚悽感留旬日不得去續文獻通考
曰元時號畏兀兒地太祖平西域置達魯花赤監治之
火州

增續文獻通考曰火州地在嘉峪關外東距哈密西連
亦力把力南抵于闐北接瓦剌自東南至肅州一月程
即漢車師前王治交河城即唐交河郡縣也後為回鶻
所據稱火州以其山色如火也明永樂十二年吏部員
外郎陳誠至其國歸言風物蕭條市里居民僧堂過半

亦皆零落東有荒城故址云古高昌國漢西域長史戊
己校尉並居焉其俗多匈奴烏孫事神信佛好騎射其
產馬索駝胡桃蒲萄蠶砂鼠磧砂胡桐律刺密鹽白氍
布鎡鐵陰牙角速霍角阿魏

土魯番

增象胥錄曰土魯番一名土爾番在火州西百里漢車
師前王地車師前王居交河城唐置西州交河郡且析
以為縣有安樂城方一二里地曠衍四面皆山城西二

十里崖兒城可二里居民百餘家相傳故交河縣治永樂十一年遣吏部員外郎陳誠使西域十三年土魯番遣使隨誠入貢授都督都指揮等官歷後朝貢不絕其俗候暖鮮雨雪宜麻麥饒瓜果羊馬室居奉佛多僧寺陳誠使還言其國城西北百里有靈山最大土人言此十萬羅漢涅槃處也近山有高臺旁寺擁石泉林木從此入山行二十里至一峽南有小土屋從屋南登山坡得石屋奉小佛像五前有池池東山石青黑遠望紛如

毛髮土人言此十萬羅漢洗頭削髮處也緣峽東南行六七里登高崖崖下小山纍纍峰巒秀削其下白石成堆似玉輕脆不可握堆中有若人骨色澤明潤土人言此十萬羅漢靈骨也又東下石崖得石筍迸出如手足稍南至山坡石復瑩潔如玉土人言此辟支佛涅槃處也周行羣山約二十餘里悉五色砂石光焰灼人四面峻壑窮崖天巧奇絕然寡草木亦鮮鳥獸自誠使後土魯番漸張旁盡諸國及關外七衛地廣人庶眎昔懸絕

矣

柳陳

增象胥錄曰柳陳一名魯陳亦曰柳城漢名柳中延光
二年以班勇為西域長史將弛刑士五百人西屯柳中
遂破車師即其地也唐平高昌置柳中縣屬西州交河
郡去哈密千里中經大川砂磧無水草馬牛過此輒死
大風倏起人馬相失白日鬼魅迷行人謂之旱海出川
西行至流砂河上有小岡云風捲浮砂所積道北火焰

山色如火城方二三里四面多田園流水環繞灌木苓
蔚候暖俗醇宜糴麥麻豆有小蒲萄甘甜無核名鎖鎖
蒲萄人二種回回男子削髮戴小罩刺婦女白布裹頭
畏兀兒男子椎髻婦人蒙阜布垂髻於額

黑婁

增象胥錄曰黑婁在嘉峪關西近土魯番世締好黑婁
貢從土魯番入其地男女山水草木禽獸並黑宣德七
年始遣使朝貢

滑國

增南史曰滑國車師之別種也漢永建元年八滑從班
勇北擊有功為後部親漢侯自魏晉以來不通中國梁
天監十五年其王厭帶夷栗陀始遣使獻方物普通元
年獻黃獅子白貂裘波斯錦等物魏之居代都滑猶小
國屬蠕蠕後稍強大征其旁國盤盤屬賓龜茲疎勒姑
墨于闐等國開地千里土地溫暖多山川少樹木有五
穀國人以麴及羊肉為糧其獸有獅子兩脚駱駝野驢

有角人善騎射女人頭上刻木為角長六寸以金銀飾之無城郭甌屋為居東向開戶其王坐金牀隨太歲轉無文字以木為契每日則出戶祀神而後食父母死其子截一耳葬訖即吉其言語待譯而後通又有阿跋檀周古枯胡密丹等國並滑旁小國也普通元年隨滑入貢

白題

增南史曰白題王姓支名史嵇毅其先蓋匈奴之別種

漢灌嬰與匈奴戰斬白題騎一人是也在滑國東去滑
六日行西極波斯地出粟麥瓜果食物畧與滑同梁普
通三年遣使貢方物


御定淵鑑類函卷二百三十六

謹案卷二百三十六第四頁前八行乃因使吉護
北道刊本吉訛求據通考改

第十六頁前二行而騫超無聞者刊本超訛起據
後漢書改

第二十頁前二行靈帝熹平中刊本熹訛嘉今改





總校官庶吉士臣張能照

校對官檢討臣龔大萬

謄錄監生臣劉鳳樞

欽定四庫全書薈要

子部

御定淵鑑類函卷二百三十七

臣紀昀詳校
詳校官兵部主事臣雷純

欽定四庫全書蒼要卷一萬一千六百八十五

子部

御定淵鑑類函卷二百三十七

邊塞部八

原龜茲 增悅般

馬耆 原姑墨

于闐 溫宿

疏勒 烏托

烏孫 雞兜

增西夜

悉居半

皮山

蒲山

烏弋山離

原大宛

增洛那

哈刺

原莎車

增阿鈎羗

原罽賓

增漕國

賽瑪爾堪

咱勒密

實喇哈雅

賽蘭

達實哈

克實

德爾默

布哈爾

揚德

納失者罕

按都呼

巴喇勒哈

亦思把罕

額爾巴拉

原條文

波斯

增達石

伏盧尼

原安息

增安國

原大夏

增吐火羅

厥達

挹怛

副貨

疊伏羅

拔豆

朱居波

渴槃陀

鉢和

波知

賒彌

烏長

乾陀

謝朶

帆延

石汗那

識匿

劫國 陀羅伊羅 越底延

原大月氏 小月氏 高附

龜茲

原杜氏通典曰龜茲漢時通焉王理延城都白山之南

二百里

隋西域圖云白山一名阿羯山常有火及烟卽是出碣砂之處

東去長安七千

五百里戶七千南與精絕東南與且末西南與杆彌北
與烏孫西與姑墨接能鑄冶俗有城郭東至都護理所
烏壘城四百里烏壘戶百十與都護同理其南三百里
至渠黎渠黎城都尉一人戶百三十東北與尉黎東南

與且末南與精絕接昭帝田輪臺與渠黎地皆相連也
增晉書曰晉武帝時其王遣子入侍惠懷末苻堅遣
其將呂光伐之其王白純距境不降光進軍討平之立
其後白震為王 北史曰城方五六里其國東有輪臺
即漢李廣利所屠者其南三百里有大河東流號計戍
水即黃河也俗性多淫置女市收男子鐵以入官土多
孔雀羣飛山谷間人取食之孳乳如雞鶩其國西北大
山中有如膏者流出成川行數里入地如餽餉甚臭齒

髮落者服之能令更生癘人服之皆愈周保定元年其王遣使來獻隋大業中遣使朝貢方物 舊唐書曰唐

貞觀四年獻馬太宗賜璽書撫慰然臣西突厥郭孝恪伐焉耆龜茲遣兵影助自是職貢頗闕帝伐之立其王之弟葉護始徙安西都護於其都統于闐碎葉疏勒號四鎮高宗復棄四鎮移安西依舊西州城堡並為賊陷長壽元年王孝傑破吐蕃復四鎮地後置安西都護府用兵三萬鎮之遠踰沙磧甚為百姓所苦言事者請棄

之則天不許 宋史曰宋自天聖至景祐入貢者五紹
聖三年使大首領阿連撒羅等以表章及玉佛至洮西
熙河經畧使以其罕通使請令於熙秦等州博買而估
所齎物價答賜遣還從之

焉耆

原杜氏通典曰焉耆漢時通焉王理員渠城

員于居反

在白

山之南七十里去長安七千三百里戶四千西南至都
護理所四百里南去尉犁百里北與烏孫接東去交河

城九百里西去龜茲九百里皆沙磧其國近海水多魚
鹽蒲葦之利四面有大山道險阨易守海水曲入四山
之內周匝其城三十餘里後漢明帝永平末有戶萬五
千與龜茲共攻沒都護陳睦至和帝元光六年都護班
超發諸國兵討之殺其王超乃立焉耆佐侯元孟為王
至安帝時西域背叛延光中超子勇為西域長史復討
定之 增晉書曰武帝太康中其王龍安遣子入侍安
夫人妊身十二月剖脇生子曰會立為世子會少而勇

傑安病篤謂會曰我嘗為龜茲王白山所辱汝能雪之
乃吾子也及會立襲滅白山遂據其國遣子熙歸本國
為王會有膽氣籌略遂霸西域葱嶺以東莫不率服其
後張駿遣沙州刺史楊宣率衆疆理西域宣以部將張
植為前鋒熙率衆先要之於遮留谷植將至或曰漢祖
畏於柏人岑彭死於彭土今谷名遮留殆將有伏單騎
嘗之果有伏發植擊敗之進據尉犁熙降於宣 北史
曰隋大業中其王龍突騎支遣使貢方物 唐書曰唐

貞觀六年龍突騎支始遣使來朝自隋亂磧路閉故西域朝貢皆由高昌突騎支請開大磧道以便行人帝許之高昌怒大掠其邊十四年侯君集破高昌突騎支引兵佐唐其後朝貢遂闕安西都護郭孝恪擊之執突騎支以栗婆準攝國事焉耆又立從兄薛婆阿那支為王執栗婆準送龜茲為其所殺阿史那社尒討龜茲擒之立婆伽利為王以修職貢

于闐一

原杜氏通典曰于闐漢時通焉都葱嶺之北二百餘里
去長安九千七百里戶三萬二千東北至都護理所三
千九百里南與婁婁接北與姑墨接東北去龜茲千四
百里東去鄯善千五百里西通皮山國四百里東去朱
俱波國千里西北至疎勒國千五百里其國之西水皆
西流注西海其東水東流注鹽澤

增唐書曰國有阿

耨達山據漢書河源出焉後漢建武末莎車王賢彊盛
攻并于闐徙其主俞林為驪歸王永平中于闐將休莫

霸反自立死兄子廣德立後遂滅莎車其國轉盛從精
絕西北至疏勒十三國皆服從而鄯善王亦始強盛自
是南道自葱嶺以東惟此二國為大順帝時遣侍子詣
闕貢獻元嘉中王敬為長史斬其王建子闐將輸焚等
斬敬自立國人殺之立建子安國焉梁武帝時凡四遣
使通江左獻方物隋大業中頻遣使朝貢其王姓王字
早示門練錦帽金鼠冠髮不令人見俗言見王髮年必
儉俗重佛法寺塔僧尼甚衆王尤信尚設齋日必親自

灑埽饋食城南五十里有贊摩寺即昔羅漢比丘盧旃
為其王造覆盆浮圖之所石上有辟支佛跣處雙跡猶
存西有比摩寺云是老子化胡成佛之所自高昌以西
諸國人深目高鼻惟此一國貌類華夏城東二十里有
大水北流號樹枝水即黃河也一名計式水城西五十
里亦有大水名達利水與樹枝水會俱北流其後併有
漢戎盧杆彌渠勒皮山五國故地其居曰西山城勝兵
四千人有玉河國人夜視月光盛處必得美玉王居繪

室俗機巧言迂大然貌恭謹相見皆跪以木為筆玉為
印凡得問遺書戴於首乃發之自漢武帝以來中國詔
書符節其王傳以相授人喜歌舞工紡績西有沙磧鼠
大如蝟色類金出入羣鼠為從初無桑蠶丐鄰國不肯
出其王即求婚許之將迎乃告曰國無帛可持蠶自為
衣女聞置蠶帽絮中關守不敢驗自是始有蠶女刻石
約無殺蠶蛾飛盡得治繭唐貞觀六年遣使入獻玉帶
安史之亂絕不復至矣 文獻通考晉天福中其王李

聖天自稱唐宗屬遣使來貢高祖遣供奉官張匡鄴高
居誨等入其國冊聖天為大寶于闐國王宋建隆二年
聖天遣使貢圭一以玉為柙使者言國城東有白玉河
西有綠玉河次西有烏玉河源出崑崙山去國城西千
三百里每歲秋水小後國人取玉於河謂之撈玉官取
後方許私取大中祥符二年其國黑韓王遣回鶻羅廝
溫等以方物來貢上詢其在路幾時去此幾里對曰涉
道一年晝行暮息不知里數昔時道路嘗有剽劫今道

路清謚行旅如流願遣安撫遠俗上曰路遠命使益以勞費爾國今降詔書汝齎往亦與命使無異也嘉祐八年十一月以其國王為特進歸忠保順砮鱗黑韓王于闐謂金翅鳥為砮鱗黑韓盖可汗之訛使言其王乞此號云元豐四年遣蕃部阿辛上表稱于闐國僂儻有福力知文法黑汗王書與東方日出處大世界田地主漢家阿舅大官家大略云路遠傾心相向前三遣使入貢未回重複數百言董氈使導至熙州譯其辭以聞詔前

三輩使人皆已朝見錫賚遣發賜敕書諭之 續文獻
通考遼聖宗統和開泰間俱入貢金時遣滿剌哈撒木
丁等貢玉璞明永樂間打魯哇亦不刺入貢其產玉胡
錦獨峰駝乳香硃砂硃珊瑚翡翠木香琥珀花蕊布名
馬膞膞膞金星石水銀阿魏安息香鷄舌香葡萄獅子
于闐二

增月光盛而美玉生 王髮見而凶年至

俱見上

于闐三

增記晉高居誨使于闐記曰自靈州過黃河行三十里
始涉沙入党項界曰細腰沙神樹沙至三公沙宿月氏
都督帳自此沙行四百餘里至黑堡沙沙尤廣遂登沙
嶺沙嶺党項牙也其酋曰撿崖天子渡白亭河至涼州
涼州西行五百里至甘州甘州回鶻牙也其南山百餘
里漢小月氏之故地也有別族號鹿角山沙陀云朱耶
氏之遺族也自甘州西始涉磧磧無水載以行甘州人
教晉使者作馬蹄木澀四竅馬蹄亦鑿四竅而綴之駝

蹄則包以鼈皮乃可行西北五百里至肅州渡金河西
百里出天門關又西百里出玉門關經吐蕃男子冠中
國帽婦人辮髮戴瑟瑟云珠之好者一珠易一良馬西
至瓜州沙州二州多中國人聞晉使者來其刺史曹元
深等郊迎問使者天子起居瓜州南十里鳴沙山云冬
夏殷殷有聲如雷云禹貢流沙也又東南十里三危山
云三苗之所竄也其西渡都鄉河曰陽關沙州西曰仲
雲族其牙帳居胡盧磧云仲雲者小月氏之遺種也其

人勇而好戰瓜沙之人皆憚之胡盧磧漢明帝時征匈奴屯田於伊吾廬蓋其地也地無水而嘗寒多雪每天煖雪消乃得水匡鄴等西行入仲雲界至大屯城仲雲遣宰相四人都督三十七人候晉使者匡鄴等以詔書慰諭之皆東向拜自仲雲界西始涉磧磧無水掘地得濕沙人置之胸以止渴又復渡陷河伐檉置水中乃渡不然則陷又西至紺州紺州于闐所置也在沙州西南云去京師九千五百里矣又行二日至安軍州遂至于

闐聖天衣冠如中國其殿皆東向曰金冊殿有樓曰七
鳳樓以蒲萄為酒又有紫酒青酒不知其所釀而味尤
美其食粳沃以蜜粟沃以酪其衣布帛有園圃花木俗
喜鬼神而好佛聖天居處嘗以紫衣僧五十人列侍其
年號同慶二十九年其國東南曰銀州廬州湄州其南
千三百里曰玉州云漢張騫所窮河源出于闐而山多
玉者此山也

疏勒

原杜氏通典曰疏勒漢時通焉王理疏勒城去長安九千三百里戶千五百都白山南百餘里東至都護理所二千二百里南有河西帶葱嶺亦名雪山在國西北百餘里河所出東去龜茲千五百里西去撥汗國

撥汗一名判汗

千里當大月氏大宛康居道南去莎車五六百里去朱俱波八九百里

隋史云東北去突厥牙帳千餘里東南去瓜州四千六百里

在于闐

國北千五百里耿恭為戊己校尉屯車師後王金蒲城為匈奴所攻恭引衆入疏勒城中乏水穿井十五丈不

得水恭整衣服向井再拜為吏士禱飛泉涌出賊遂退
增北史曰後魏文成末其王遣使送釋迦牟尼佛袈
裟一長二丈餘帝以其審是佛衣當有靈異置於猛火
之上經日不燃觀者悚駭其人文身碧瞳手足皆六指
產子束頭使褊非六指者即不育 原文獻通考曰其
王姓裴氏自號阿摩支唐貞觀十三年與朱俱波甘棠
貢方物開元十六年遣大理正喬夢松等冊其君安定
為疏勒王

烏孫一

原杜氏通典曰烏孫漢時通焉大昆彌理赤谷城

烏孫其形

最異青眼赤髮鬚狀類獼猴其國謂王曰昆彌亦曰昆莫

去長安八千九百里户十

三萬東至都護理所千七百里西至康居蕃內地五千

里東與匈奴西北與康居西與大宛南與城郭諸國接

本塞地也 增文獻通考曰地莽平多雨寒山多松楸

無田作種樹隨畜逐水草與匈奴同俗國多馬富人至

四五千匹民剛惡貪狠多寇盜最為強國 原杜氏通

典曰張騫言烏孫本與大月氏共在燉煌間今烏孫強
大可厚賂招令東居故地妻以公主以制匈奴武帝即
位令騫齎金幣徃昆莫於是發使獻馬願尚公主元封
中遣江都王建女細君為公主以妻焉公主別埋宮室
而居歲時一再與昆莫會置酒飲食昆莫年老語言不
通公主悲愁自作歌以述意天子聞而憐之昆莫死孫
岑陬立岑陬者官號也名軍須靡公主死漢復以楚王
戊之孫解憂為公主妻之岑陬死季父子翁歸靡立號

曰肥王復尚解憂公主宣帝初公主及昆彌翁歸靡上
書言匈奴連歲侵擊欲發國中精兵自給人馬五萬騎
盡力擊匈奴唯天子出兵以救本始三年漢發十五萬
騎五將軍分道並出遣校尉常惠持節護烏孫兵昆彌
將五萬騎從西方入至匈奴右谷蠡王庭

谷音鹿
蠡音黎

獲四

萬級馬牛羊驢橐駝七十餘萬宣帝時都護鄭吉請分
烏孫為大昆彌後段會宗為都護時烏孫兵圍之驛騎
上書願發城郭燉煌兵以自救丞相王商大將軍王鳳

及百僚議數日不決上召陳湯問對曰臣以為此必無
可憂夫胡兵五而當漢兵一何者兵刃撲鈍弓弩不利
今聞頗得漢巧然猶三而當一又兵法曰客倍而主人
半然後敵今烏孫人衆不足以勝會宗惟陛下勿憂且
兵輕行五十里重行三十里今會宗發城郭燉煌歷時
而至所謂報讐之兵非救急之用也九合不能久攻不
過五日當有吉語聞居四日軍書至言已解會宗招還
亡畔安定之

增續文獻通考曰遼太祖時嘗來貢

烏孫二

增夫人持節

公主學琴

漢書楚王侍者馮嫫能史書習事嘗持節為公主行賞諸

國敬信之號曰馮夫人宣帝徵馮夫人錦車持節詔焉又曰宣帝時烏孫公主遣女至京學鼓琴

烏孫三

增歌漢烏孫公主悲愁歌曰吾家嫁我今天一方遠託
異國兮烏孫王穹廬為室兮旃為牆以肉為食兮酪為
漿居常土思兮心內傷願為黃鵠兮歸故鄉

悅般

增北史曰悅般國在烏孫西北其先匈奴北單于之部落為漢車騎將軍竇憲所逐北單于度金微山西走康居其羸弱不能去者住龜茲北地方數千里衆可二十餘萬涼州人猶謂之單于王其風俗言語與高車同而其人清潔剪髮齊眉以餽餉塗之昱昱然光澤日三澡漱然後飲食其國南界有火山山傍石皆焦鎔流地數十里乃凝堅人取以為藥即石硫黃也與蠕蠕結好其王嘗入蠕蠕國欲與大檀相見入其界見其人不浣衣

不絆髮婦人口舐器物王謂其從臣曰汝曹誑我入此
狗國中乃馳還大檀追之不及自是相仇討魏真君九
年遣使朝獻送送幻人稱能割人喉脈令斷擊人頭令
骨陷皆血出或數升或盈斗以草藥納其口中令嚼咽
之須臾血止養瘡一月復常又無痕世祖疑其虛乃取
死罪囚試之皆驗云中國諸名山皆有此草乃使人受
其術而厚遇之又言其國有大術者蠕蠕來抄掠術人
能作霖雨盲風大雪及行潦蠕蠕凍死漂亡者十二三

是歲再遣使朝貢求與官軍東西齊契討蠕蠕太武嘉
其意命以淮南王他為前鋒仍詔有司以其鼓舞之節
施於樂府自後每使朝貢

姑墨

原杜氏通典曰姑墨漢時通焉王理南城去長安八千
一百里戶三千五百東至都護理所千里南至閼馬
行十五日北界接烏孫 增新唐書曰自龜茲西羸六
百里踰小碛磧有跋祿迦小國一曰亟墨即漢姑墨國

橫六百里縱三百里風俗文字與龜茲同言語少異西
三百里度石磧至陵山葱嶺北原也水東流春夏山谷
積雪

溫宿

原杜氏通典曰溫宿漢時通焉王理溫宿城去長安八
千三百餘里戶二千二百東至都護理所二千三百餘
里西至尉頭三百里北至烏孫赤谷六百餘里

烏秣

原杜氏通典曰烏托漢時通焉王理烏托城去長安萬里戶五百東北至都護理所四千九百北與子合蒲黎西與難兜接 增文獻通考曰其國後魏又通謂之於摩國

難兜

原杜氏通典曰難兜漢時通焉去長安萬一百里戶五千東北至都護理所二千八百里西南至罽賓三百里南與婁羌北與休屠西與大月氏接

西夜

增漢書曰西夜國王號子合王治呼犍谷去長安萬二百五十里勝兵千人東與皮山西南與烏托北與莎車西與蒲犁接蒲犁及依耐無雷國皆西夜類也其種類羌氏行國隨畜逐水草而子合土地出玉石

悉居半

增後魏書曰悉居半國故西夜也在于閼西太延初遣使來獻自後貢使不絕

皮山

增漢書曰皮山王治皮山城去長安萬五千里勝兵五百人西南至烏秣國千三百四十里南與天竺接北至姑墨千四百五十里西南當罽賓烏弋山離西北通莎車三百八十里

蒲山

增後魏書曰蒲山國故皮山國也居皮城在于闐南其國西南三里有凍凌山後役屬於闐

烏弋山離

增漢書曰烏弋山離國去長安萬二千二百里不屬都護戶口多大國也東北至都護治所六十日行東與罽賓北與樸桃西與犂靬條支接行可百餘日至條支

大宛

原杜氏通典曰大宛漢時通焉王理貴山城去長安萬二千五百里戶萬東至都護理所四千里北至康居于闐城千五百里西南至大月氏七百里北與康居南與

大月氏接 增漢書曰以葡萄酒為酒富人藏酒至萬餘

石久者數十年不敗人嗜酒馬嗜苜蓿 原杜氏通典

曰多善馬汗血言其先天馬子

大宛同中有高山其上
有馬不可得因取五色

母馬置其下與集生駒
皆汗血因號為天馬子

始張騫為武帝言之帝遣使者

持千金及金馬以請宛善馬宛王以漢絕遠大兵不能

至遂殺漢使於是太初元年拜李廣利為貳師將軍期

至貳師取善馬率數萬人至其境攻郁城不下引還往

來二歲至燉煌士卒存者十不過一二帝怒其不尅使

遮王門不許入貳師因留屯燉煌又遣貳師率六萬人

負私從者不與焉牛十萬馬三萬匹驢橐駝萬數天下

騷然益發戍甲卒十八萬置居延休屠

今武威張掖郡界

以衛

酒泉貳師至宛宛人斬王無寡首獻焉漢軍取其善馬

數十匹中馬以下牝牡三千匹而立宛貴人昧蔡為王

約歲獻馬二匹遂採葡萄苜蓿種而歸 增漢書曰天

子以馬多益種葡萄苜蓿離宮館旁極望焉 文獻通

考曰其人皆深目多髭髯善賈其俗貴女人女子所言

丈夫乃決正其地無絲漆不知鑄器及漢亡卒降教鑄作兵器焉隋時蘇對沙那國即漢大宛也

洛那

增北史曰洛那國故大宛國也都貴山城在疏勒西北太和三年遣使獻汗血馬

哈喇

增續文獻通考曰哈喇在肅州之西相去一萬一千餘里東北至賽瑪爾堪一千四百里即漢之大宛也其地

俱平川四面大山薩哈勒國人尊之為蘇勒坦猶華言
君王也東有按都呼巴喇勒哈等城皆隸焉俗衣服喜鮮
潔色尚白有喪易以青國主居窗辟以金銀瑟瑟為飾
富家居室服用頗同國主禮儀簡略君臣相見但行跪
禮無刑法有罪罰錢而已坊市不設斗斛但用權衡食
亦無匕箸惟以手取婚室多以姊妹謂為至親死無棺
槨以布囊裹屍瘞之國有學舍以居遊學之士無正朔
不用甲子以七日為一周擇日用事則以第一日名阿

啼納為上吉凡拜天聚會用之酒禁甚嚴修行者多不
飲恐褻天也其產亦有金銀銅鐵珊瑚琥珀珠水晶翡
翠名馬狡獬織鳥毳為鎖伏紋如紈綺又有花毯極細
密色久不變食物有葡萄巴旦杏明永樂七年朝貢正
統二年貢馬玉石

莎車

原杜氏通典曰莎車漢時通焉理莎車城去長安九千
九百里戶二千三百東北至都護理所四千七百里西

去疏勒五百里西南至蒲犂七百里宣帝時莎車王呼
屠徵殺漢使者約至國叛漢會衛侯馮奉世使大宛以
便宜發諸國兵擊殺之傳其首詣長安諸國悉平威振
西域奉世至大宛大宛聞其斬莎車王敬之異於他使
得其名馬象龍而還馬形似龍帝甚悅下議封奉世少府蕭
望之以奉世擅制發諸國兵雖有功效不可以為後法
即封奉世關內侯後奉使者利以奉世為比爭逐發兵
要功萬里之外為國家生事於夷狄漸不可長不宜受

封帝善其議以奉世為光祿大夫元帝時奉世死後二

年西域都護甘延壽以誅郅

賁音

支單于封為列侯於是

杜欽上疏追訟奉世前功曰前莎車王殺漢使者約諸

國背叛而奉世以便宜發兵誅莎車王策定城郭功施

邊境議者以奉世奉使有指春秋之義亡遂事漢家之

法有矯制故不得侯今匈奴郅支單于殺漢使者亡保

康居都護延壽發城郭兵屯田吏士四萬餘人以誅斬

之封為列侯臣愚以為比罪則郅支薄量敵則莎車衆

用師則奉世寡制勝則奉世多於邊境居安慮危則延
壽為禍於國家深其違命而擅生事同延壽則割地封
而奉世獨不錄臣聞功同賞異則勞臣疑願下有司議
帝以先帝時事不復錄 增文獻通考曰匈奴因王莽
之亂畧有西域唯莎車王延強不附屬元帝時嘗為侍
子長於京師慕樂中國亦復參其典法常敕諸子當世
奉漢家不可負也延死子康代立檄書河西問中國動
靜自陳思慕漢家河西大將軍竇融承制立康為漢莎

車建功懷德王西域大都尉五十五國皆屬焉康死弟
賢代立攻破拘彌西夜國皆殺其王而立其兄康兩子
為拘彌西夜王十七年遣使奉獻請都護天子以問大
司空竇融以為賢父子兄弟相約事漢款誠又至宜加
號位以鎮安之帝乃因其使賜賢西域都護印綬及車
旂黃金錦繡燉煌太守裴遵不可詔書收還都護印綬
更賜賢以漢大將軍印綬賢由是始恨而猶詐稱大都
護移書諸國諸國悉服屬焉號賢為單于賢浸以驕橫

數攻龜茲諸國諸國恐懼二十一年冬車師前王鄯善
焉耆等十八國俱遣子入侍獻其珍寶願得都護天子
以中國初定北邊未服皆還其侍子厚賞賜之二十二
年賢發兵攻鄯善其冬復攻殺龜茲王遂兼其國鄯善
王上書願復遣子入侍更請都護都護不出誠迫於匈
奴天子報曰今使者大兵未能得出如諸國力不從心
東西南北自在也於是車師鄯善復附匈奴而賢益橫
焉耆王自以國遠遂殺賢使者賢擊滅之立其國貴人

駟韃為媯塞王賢又自立其子則羅為龜茲王賢以則
羅年少乃分龜茲為烏壘國徙駟韃為烏壘王又更以
貴人為媯塞王又徙于閼王俞林為驪歸王立其弟位
侍為于閼王歲餘賢疑諸國欲叛召位侍及拘彌姑墨
子合王盡殺之不復置王但遣將鎮守其國蒞車將軍
得在于閼暴虐國人患之其大人都未出城見野豕欲
射之豕乃言曰無射我我為汝殺君得都未因與兄弟
共殺君得賢引兵攻于閼兵敗而走于閼大人休莫霸

進圍莎車中流矢死兵乃退于闐立休莫霸兄子廣德
為王 原杜氏通典曰建武中廣德攻莎車執王賢殺
之匈奴聞廣德滅莎車遣兵將賢質子不居微立為王
章帝時長史班超發諸國兵擊破之由是遂降

阿鈎羌

增北史曰阿鈎羌在莎車西南國西有懸度山其間四
百里有棧道下臨不測之淵人行以繩索相持而度因
以名之

蜀賓一

原杜氏通典曰蜀賓在懸度山西漢時通焉王理循鮮城去長安萬二千二百里不屬都護戶口勝兵多大國也東北至都護理所六千八百里東至烏秬國二千二百里東北至難兜國九日行西北與大月氏西南與烏弋山離接增漢書曰昔匈奴破大月氏大月氏西居大夏而塞王南居蜀賓蜀賓地平溫和有苜蓿雜草奇木檀櫟梓竹漆種五穀葡萄諸果地下濕生稻冬食生

菜其民巧雕文刻鏤治宮室織罽刺文繡好治食有金銀銅錫以為器市列以金銀為錢文為騎馬幕為人面錢文面作騎馬形漫面作人面目篆音漫謂平而無文也出封牛水牛象大狗沐猴孔雀珠璣珊瑚琥珀辟流離原杜氏通典曰自漢武

帝始通罽賓自以絕遠漢兵不至雖遣使貢獻屢殺漢使至成帝時又遣使者奉獻漢欲遣使者報送其使杜欽說大將軍王鳳曰凡中國所以為通厚蠻夷愜快其求者為壤比而為寇也今懸度之阨非罽賓所能越也

其鄉慕不足以安西域雖不附不能危城郭

城郭總謂西域諸國

也今遣使皆行賈賤人欲通債市買以朝獻為名故煩

使者送至懸度恐失實見欺凡遣使送客者欲防護寇
害也起皮山南更不屬漢之國四五斥候士百餘人五
分夜擊刁斗自守尚時為所侵盜驢畜負糧須諸國廩
食得以自贍國或貧小不能食或桀黠不肯給擁強漢
之節餒山谷之間離一二旬則人畜棄捐曠野而不反
又歷大頭痛小頭痛之山赤土身熱之阪令人身熱無

色頭痛嘔吐驢畜盡然又有三池盤石阪道隘者尺六七寸長者徑三十里臨崢嶸不測之深行者騎步相持繩索相引二千餘里乃到懸度險阻危害不可勝言聖王分九州制五服務盛內不求外今遣使者承至尊之命送蠻夷之賈勞吏士之衆涉危難之路罷弊所恃以事無用非久長計也於是鳳白從欽言

蜀賓二

增頭痛山 身熱阪

俱見上

漕國

增北史曰漕國在葱嶺之北漢時屬賓國也其王姓昭武康國王之宗族都城方四里勝兵萬餘人國法嚴整殺人及盜皆死其俗淫祀葱嶺山有順天神者儀制極華金銀鑠為屋以銀為地祀者日千餘人祠前有一魚脊骨其孔中通馬騎出入北去帆延七百里東去劫國六百里南去瓜州六千六百里大業中遣使貢方物新唐書曰唐武德二年遣使貢寶帶金鎖水精醃頗梨

狀若酸棗貞觀中獻名馬十六年獻褥特鼠喙尖尾赤能食蛇螫者嗅且尿瘡即愈開元七年遣使獻天文及祕方奇藥其王請以子拂菻屬婆嗣聽之

賽瑪爾堪一

增續文獻通考曰賽瑪爾堪地在額爾巴拉西西連哈喇東至肅州九千里即漢之屬賓地東去嘉峪關九千九百里土田膏腴宜五穀饒衍甲諸國人物秀美多藝能元駙馬特穆爾王其國東有揚德實喇哈雅賽藍達

實哈西有克實德爾默默諸城皆隸焉明洪武丁卯國王特穆爾遣回回瑪拉噶非思等貢駝馬詔厚賜之弘治三年由海道貢獅子禮官倪岳言南海非西域貢道請却之自後皆從嘉峪關入嘉靖中其國稱王者五十三人皆遣人朝貢

賽瑪爾堪二

增鐵門峽

火站河

明一統志鐵門峽在克實城西懸崖絕壁高數十仞深二三里夷人

守此名鐵門關

火站

河在實喇哈雅城西

咱勒密

增續文獻通考曰咱勒密在海中地不百里人不滿千家服屬賽瑪爾堪明永樂中遣使十八人來朝貢方物賜大統厯西北有小國曰喀繖曰哈薩爾沙廸滿曰喀什噶爾曰哈達埒曰賽蘭曰色呼克曰額爾巴哲曰默克里曰巴達木沙曰拜勒哈曰阿勒瑪曰圖呼瑪克曰察里實曰堪齊曰布哈喇曰怕喇曰錫喇斯曰尼沙布爾曰克什密爾曰特布哩斯曰郭納錫斯曰和閑曰和占曰庫先

曰實喇哈雅曰雅濟曰雅勒謙題曰戎曰烏倫曰阿穆曰
禁錫城曰坤城曰實瑪勒曰拜伊曰克恰曰元方曰日落
諸國皆經哈密入貢或三年五年無恒期後哈密殘破
多徑叩嘉峪關然亦未數至

實喇哈雅

增象胥錄曰實喇哈雅在賽瑪爾堪東五百里城據小
岡西北臨山河河名水站勢衝急有浮梁其地南山三
面皆平川居人依崖谷頗繁庶西有大沙洲可二百餘

里無水間有水不可飲牛馬飲輒死有臭草根株獨立
高尺許枝葉如蓋穢氣逼人取生汁熬膏即阿魏也亦
有細草以熬膏味如蜜

賽蘭

增象胥錄曰賽蘭一作賽藍去賽瑪爾堪千里在達實
哈東城周三里有浮圖為祈拜之所四面平原流水環
繞草木豐茂五穀蕃殖夏秋間草生黑蜘蛛小而甚毒
齧人遍體作痛號呼動地土人誦咒禳解以薄荷枝拂

毒處又以羊肝擦之一晝夜痛息膚如蛻牛馬被傷輒死行人宿必近水避焉

達實哈

增象胥錄曰達實哈在賽蘭西去賽瑪爾堪七百里城甚狹小四面平岡溪流蜿蜒多林木土宜五穀居民稠密俗朴而饒

克實

增象胥錄曰克實在賽瑪爾堪西南二百六十里城周

十餘里四面水田東南近山中有園林頗宏麗元特穆
爾駙馬居也墻壁窗櫺飾以金碧琉璃堂四隅白石柱
如玉西行十餘里多奇樹又西三百里大山屹立中有
石硤兩壁懸崖如斧劈行二三里出硤石有門石色如
鐵人指云此鐵門關也元太祖至東印度駐鐵門關有
一角獸形如鹿而馬尾其色綠作人言以問耶律楚材
對曰此瑞獸名角端能言四方語好生惡殺帝為班師
蓋其地近東印度矣

德爾默

增象胥錄曰德爾默去哈喇二千餘里在賽瑪爾堪西
南新舊二城相去十餘里王居新城東距阿木河河廣
非舟不可渡多魚城內外居民僅數百家孳畜蕃息河
東地隸賽瑪爾堪河西有蘆林多獅子

布哈爾

增象胥錄曰布哈爾在賽瑪爾堪西七百里城居平川
周十餘里市里華庶戶口萬計地廣衍宜五穀天氣溫

和產布帛絲綿大類中國

揚德

增象胥錄曰揚德在賽蘭賽瑪爾堪額爾巴拉蒙古諸
部落間數相侵掠無寧居惟數百人戍孤城四面皆亂
山東北有大溪西流長數百里

納實賽罕

增象胥錄曰納實賽罕東去實喇蘇數日程皆舟行海
中其國有山林川澤魚蟲城東平原饒水草可牧馬馬

有數種最小者高不過三尺俗重僧所至飲食之顧尚氣健鬪以不勝為嗤鄙永樂中遣使朝貢

按都呼

增象胥錄曰按都呼西南去哈喇千三百里東北去賽瑪爾堪如之土沃人稠稱樂土永樂中嘗遣使朝貢

巴喇勒哈

增象胥錄曰巴喇勒哈一名巴林在按都呼東北城居平川周十餘里南近山無險地廣物豐饒西南諸番賈聚

焉又巴喇勒哈商其國奉佛浮圖壯麗如王宮永樂間朝貢方物織皮絨罽香木疑即巴喇勒哈

伊斯帕罕

增象胥錄曰伊斯帕罕廣袤近千里於西南海中為大國四面皆海西北多山東南皆平沙王居宏麗城亦堅壯產饒俗朴食惟麥糝麥粒麤而甘美少布帛稻黍多馬駝琥珀亦有中國人流寓時賈賽瑪爾堪以取給永樂中遣使朝貢亦云伊斯帕罕

額爾巴拉

增續文獻通考曰額爾巴拉不知古何國地居沙漠間
在肅州西北三千七百里疑即焉耆或龜茲地也龜茲
國在白山南都延城今其地東西三千餘里南北二千
餘里東距火州西抵賽瑪爾堪南接于闐北連威喇地
無房屋逐水草置氈帳以居少五穀畜牛羊駝馬飲食
惟肉酪衣服類回回語言類輝和爾其王髡髮戴罩刺
帽挿鵝鵠翎設綵繡氈帳席地而坐與使者相見不拜

揖惟行跪禮其山有白山中常起火煙蓋出硃砂之處
採者著木底鞵取之皮著即焦有熱海周數百里俗呼
亦息渴兒所產有銅鐵鉛雌黃胡粉馬羣牛孔雀氍毹
駝葡萄刺蜜亦有阿魏白氎布硃砂元名其地為伯實
巴里憲宗分建諸王合丹於此世祖立宣慰司以萬戶
綦公直為使後置元帥府以領屯田明洪武二十四年
國王哈達爾和卓遣使貢馬永樂四年貢玉璞十六年
烏蘇弒其從兄王納凱沙扎海自立為王徙其國西去

遂更國號額爾巴拉

條支

原杜氏通典曰條支漢時通焉去陽關二萬二千一百里在葱嶺西城在山上週迴四十餘里臨西海海水曲環其南及東北三面路絕惟西北隅通陸道 增文獻

通考曰土地暑濕田宜稻有大鳥卵如甕善眩其草木

畜產五穀果菜食飲宮室市列錢債兵器金珠之屬皆

與罽賓同而有桃拔獅子犀牛

桃拔一名符拔似鹿長尾一角者或為天鹿兩

角者或為辟邪

其錢獨文為人幕為騎馬

原杜氏通典曰和

帝永元中班超遣掾甘英使大秦抵條支臨大海欲渡而安息西界船人謂英曰海水廣大往來者逢善風三月乃得渡若遇惡風雨亦有三歲者英聞而止 增漢書曰安息長老傳聞條支有弱水西王母亦未嘗見也自條支乘水西行百餘日近日所入云

波斯

原杜氏通典曰波斯後魏時通焉在達曷水之西都宿

利城

後周書云蘓利城隋書云蘓
蘭城記錄音訛其實一也

有河經其城中南流

即條支之故地也大月氏之別種其先有波斯匿王其

子孫以王父字為氏因為國號焉王姓波斯戶十餘萬

東去中國萬餘里西去海數百里東南去穆國四千餘

里西北去拂菻四千五百里 增文獻通考曰有樓觀

屋宇佛寺城西十五里有土山山周迴高大其勢連接

甚遠中有鷲鳥噉羊土人極以為患其王坐金羊座戴

金花冠衣錦袍織成帔飾以真珠寶物其俗丈夫剪髮

戴白皮帽貫頭衫兩肩近下開之并巾帔緣以織成婦

人服大衫帔仍貫五色珠絡之於膊王即位後擇諸子

內賢者密書其名封於庫王死乃共發書立為王餘子

各出就邊任國人號王曰醫才割妃曰防步率王之

諸子曰殺野其刑法重罪懸竿射而殺之次則繫獄新

王立乃釋以六月為歲首尤重七月七日十二月一日

其日設會作樂以相歡娛氣候暑熱家自藏冰其地多

砂磧引水溉灌其五穀及禽獸與中夏畧同唯無稻黍

土出名馬及駝象獅子多良犬有大鳥形如橐駝有兩
翼飛而不能高食草與肉亦能噉人有大鳥卵真珠頗
梨珊瑚琉璃瑪瑙水精瑟瑟金銀鍮石金剛火齊銅錫
鑛鐵朱砂水銀錦疊細布曜瑜毼毼護那越諾布金鏤
織成赤麋皮熏陸鬱金蘓合青木等香胡椒華撥石蜜
千年棗香附子訶黎勒無食子鹽綠雌黃又有優鉢曇
花鮮華可愛地有鹹池俗尊右下左祠天地日月水火
戰乘象魏神龜中其國遣使上書貢物云大國天子天

之所生願日出處常為漢中天子波斯國王居和多千
萬敬拜朝廷嘉納之唐貞觀十二年遣使朝貢又獻活
褥蛇狀類鼠色正青長八九寸能入穴取鼠龍朔初又
訴為大食所侵時天子遣使西域分置州縣以疾陵城
為波斯都督府拜其王為都督咸亨中入朝授右武衛
將軍死始其子泥涅師為質調露元年詔裴行儉將兵
護還復王其國至安西碎葉以道遠行儉還泥涅師因
客土火羅景龍初復來朝授左威衛將軍無何病死其

國滅而部衆猶存開元天寶間遣使者十輩獻瑪瑙牀
火毛繡舞筵續文獻通考曰遼太祖天贊二年波斯
來貢

大食一

增新唐書曰大食本波斯地隋大業中有波斯國人牧
於俱紛摩地那山有獸言曰山西三穴有利兵黑石而
白文得之者王走視如言石文言當反乃詭衆糾亡命
於恒曷水劫商旅保西鄙自王於是遂滅波斯永徽二

年始遣使朝貢自言王大食氏有國三十四年傳二世其王嘗遣人入海經八年而未極西岸海中見一石上有樹幹赤葉青樹上總生小兒長六七寸見人不語而能竦動其手足頭著樹枝人摘取入手即乾黑其使得一枝獻在王宮開元初遣使獻馬鈿帶其使謁見平立不拜憲司欲糾之中書令張說奏曰大食殊俗遠來慕義不可置罪上特許之尋又遣使來獻自云本國惟拜天神雖見王亦無致拜之法有司屢詰責之遂依漢法

致拜 文獻通考或曰大食族中有孤列種世為長號
白衣大食種有二姓一曰盤尼末換二曰奚深有摩訶
末者勇而智衆立為主闢地三千里克夏臘城傳十四
世至末換殺兄伊疾自王下怨其忍有呼羅珊木鹿人
並波悉林將討之徇衆曰助我者皆黑衣俄而衆數萬
即殺末換求奚深種孫阿蒲羅拔為王更號黑衣大食
宋太平興國二年遣使貢方物其從者目深體黑謂之
崑崙奴雍熙元年國人花茶復來獻花錦越諾揀香白

龍腦白沙糖薔薇水琉璃器淳化四年又遣其副蕃長
李亞勿來貢其國舶主蒲希密至南海以老病不能詣
闕乃以方物附亞勿來獻希密進象牙乳香賓鐵紅絲
古貝五色雜花番錦白越諾琉璃瓶無名異薔薇水等
詔賜希密敕書錦袍銀帶以答之至道元年其國舶主
蒲押陀黎齋蒲希密表引對於崇政殿譯者代奏云父
蒲希密因緣射利泛舶至廣州逮今五稔未歸母令臣
遠來尋訪昨至廣州見之具言前歲蒙皇帝聖恩令命

臣奉章來謝以方物致貢大中祥符元年十月車駕東
封舶主陀婆離上言願執方物赴泰山從之其國部屬
各異名故有勿巡有陀婆離有俞盧和地有麻囉拔等
國然皆冠以大食勿巡所貢又有龍腦兜羅錦毬錦襖
番花簾陀婆離有金飾壽帶連環臂鈎數珠之屬其國
在泉州西北自泉州發船四十餘日至藍里博易住冬
次年再發順風六十餘日方至其國本國所產與三佛
齊貿易商賈轉販以致中國其地廣袤民俗侈麗天氣

多寒雪厚二三尺故貴氈毯國據諸番衝要其王錦衣
玉帶朔望戴百寶純金冠其居以瑪瑙為柱綠甘為屏
水晶為瓦碌石為磚活石為灰帷幕之屬悉用百花錦
官有丞相太尉各領兵二萬餘人續文獻通考曰遼
太祖三年大食國來貢聖宗開泰九年大食國王遣使
進象及方物為其子冊割請婚以王子班郎君胡思聖
女可老封公主降之

大食二

增記杜瓌經行記曰大食一名亞俱羅其王號暮門都
此處其士女瓌偉長大衣裳鮮潔容止閑麗女子出門
必擁蔽其面無問貴賤一日五時禮天食肉作齋以殺
生為功德繫銀帶佩銀刀斷飲酒禁音樂有禮堂容數
萬人每七日王出禮拜登高座為衆說法曰人生甚難
天道不易奸非劫竊細行謾言安已危人欺貧虐賤有
一於此罪莫大焉凡在征戰為敵所戮必得生天殺其
敵人獲福無量率土稟化從之如流法唯從寬葬唯從

儉郭郭之內里閑之中土地所生無物不有四方輻湊
萬貨豐賤錦繡珠貝滿於市肆駝馬驢騾充於街巷刻
石木為廬舍有似中國寶輦每至節日則獻貴人琉璃
器皿鍤石瓶鉢蓋不可數算其果有褊桃千年棗其蔓
青根大如斗而圓味甚美餘菜亦與諸國同葡萄大者
如雞子香油貴者有二一名查塞漫一名沒國女甲反
師香草貴者有二一名查塞莽蒲孔反一名藜蘆爰綾
絹機杼金銀匠畫匠漢匠起作畫者京兆人樊淑劉泚

織絡者河東人樂隈呂禮又有橐駝駕車其馬俗云西
海濱龍與馬交所產也腹小腕長善者日走千里其駝
小而緊背有孤峰良者日馳千里又有駝鳥高四尺以
上足似駝蹄頸項勝人騎行五六里其卵大如二升又
有薺樹實如夏棗堪作油食除瘴其氣候溫土地無冰
雪人多瘡痢一年之內十中五死吞滅四五十國皆為
所役屬分其兵鎮守其境盡於西海焉又未祿國在亞
梅國西南七百餘里胡姓末者茲土人也其城方十五

里鐵為城門城中有鹽池其境東西百四十里南北百
八十里邨柵連接樹木交映四面合匝總是流沙南有
大河流入其境分渠數百灌溉一川其土沃饒其人淨
潔墻宇高厚市廛平正木旣雕刻土亦繪畫又有細軟
疊布羔羊皮裘果有紅桃白柰遏白黃李瓜大者名尋
支十餘人餐一顆輒足越瓜長四尺以上菜有蔓菁蘿
蒲長葱顆葱芸臺胡芹葛藍單達茴香笑薤瓠蘆尤多
葡萄又有黃牛野馬水鴨石雞其俗以五月為歲首歲

以畫缸相獻有打毬節鞦韆節其大食東道使鎮於此
又苦國在大食西界周廻數千里造屋兼瓦壘石為辟
米穀殊賤有大川東流入亞俱羅商客糴此糴彼往來
相繼人多魁梧衣裳寬大有似儒服其苦國有五節度
兵馬一萬以上北接可薩突厥可薩北又有突厥足似
牛蹄好噉人肉

伏盧尼

增後魏書曰伏盧尼國都伏盧尼城在波斯國北累石

為城東有大河南流中有鳥其形似人亦有如橐駝馬者皆有翼常居水中出水便死城北有云尼山出銀珊瑚琥珀多獅子

安息

原杜氏通典曰安息國漢時通焉王理番兜城

番音盩

去

長安萬一千六百里在葱嶺之西大宛之西可數千里不屬都護北與康居東與烏弋山離西與條支接增漢書曰土地風氣物類民俗與烏弋屬賓同亦以銀為

錢文獨為王面幕為夫人面有大馬爵其屬大小數百城方數千里最大國也臨媯水商賈車船行旁國書革旁行為書記武帝始遣使至安息其王令騎迎於東界去王都數千里行比至過數十城人民相屬因發使隨漢使者以大鳥卵及犂靬眩人獻於漢 後漢書曰其

東界木鹿城號為小安息章和元年遣使獻獅子符拔符拔形似麟而無角自安息西行三千四百里至阿蠻國從阿蠻西行三千六百里至斯賓國從斯賓南行渡

河又西至于羅國九百六十里安息西界極矣自此南乘海乃通大秦其土多海西珍奇異物

安國

增隋書曰安國漢時安息國也王姓昭武與康國王同族都那密水南城有五重環以流水宮殿皆為平頭王坐金駝座高七尺風俗同於康國煬帝遣杜行滿使西域至其國得五色鹽而返大業五年遣使貢獻

大夏

原杜氏通典曰大夏漢時通焉在大宛西南二千餘里
媯水南其俗土著有城屋與大宛同俗去漢萬二千里
居漢西南本無大君長城邑徃徃置小君長其兵弱畏
戰史記曰其都曰藍市城有市販賣諸物東南有身
毒國張騫曰臣在大夏時見筴竹杖蜀布問曰安得此
大夏國人曰吾賈人徃市之身毒身毒國在大夏東南
可數千里

吐火羅

增新唐書曰吐火羅或曰土豁羅曰覩貨邏元魏謂吐
呼羅者居葱嶺西烏澹河之南古大夏地與挹怛雜處
勝兵十萬國土著少女多男北有頗黎山其陽穴中有
神馬國人遊牧牝於側生駒輒汗血其王號葉護武德
貞觀時再入獻永徽元年獻大鳥高七尺色黑足類橐
駝鼓翅而行日三百里能噉鐵俗謂駝鳥顯慶中以其
阿緩城為月氏都督府析小城為二十四州授王阿史
那都督後二年遣子來朝俄又獻瑪瑙鎧樹高三尺開

元天寶間數獻馬騷異藥乾陀婆羅二百品紅碧玻璃
乃冊其君為吐火羅葉護挹怛王

噉噉

增後魏書曰噉噉國大月氏之種類也亦曰高車別種
其原出於塞北自金山而南在于闐之西都烏澹水南
二百餘里去長安一萬一百里其王都拔底延城蓋王
舍城也其城方十餘里多寺塢皆飾以金風俗與突厥
略同其俗兄弟共一妻夫無兄弟者妻戴一角帽若有

兄弟者依其多少之數更加角焉衣服類加纓絡頭皆剪髮其王巡歷而行每月一處冬寒時三月不徙王位不必傳子子弟堪者死便授之用刑嚴急偷盜無多少皆腰斬其人凶悍能鬪戰西域康居于闐沙勒安息及諸小國皆役屬之

挹怛

增隋書曰挹怛國都烏澹水南二百里大月氏種也勝兵五六千人善戰俗同吐火羅南去曹國千五百里東

去瓜州六千五百里隋大業中遣使來貢 文獻通考
曰按劉璠梁典滑國姓噉噉後裔以姓為國號轉訛又
謂之挹怛焉

副貨

增北史曰副貨國東至阿富汗使且國西至沒誰國中間
相去千里南有連山不知名北至奇沙國相去千五百
里國中城周匝七十里宜五穀葡萄國王有黃金殿殿
下金駝七頭高三尺孝文帝時遣使朝貢

疊伏羅

增北史曰疊伏羅國去代三萬一千里國中有勿悉城
城北有鹽竒水西流有白象并有阿末黎木皮織作布
土宜五穀宣武時遣使獻方物

拔豆

增北史曰拔豆國去代五萬一千里東至多勿當國西
至旃那國中間相去七百五十里南至罽陵伽國北至
弗那伏且國中間相去九百里國中出金銀雜寶白象

水牛犛牛葡萄五果土宜五穀

朱居波

增杜氏通典曰朱居波後魏時通焉亦名朱居槃國漢
子合國也并有西夜蒲犁依耐得若四國之地在于闐
國西千餘里其西至渴槃國南至女國三千里北至疏
勒九百里東至葱嶺二百里其王本疏勒國人宣武永
平中遣使朝貢唐武德以後頻遣使朝貢

渴槃陀

增文獻通考曰渴槃陀後魏時通焉亦名漢陀國亦名
渴羅國治葱嶺中在朱居波國西西至護密國其南至
懸度山無定界北至疏勒國界西北至判汗國其王本
疏勒人懸度山在國西南四百里懸度者名山也谿谷
不通以繩索相引而度其間四百里中徃往有棧道因
以為名懸度葱嶺迤邐相屬郵置所絕道阻且長故行
人由之莫能分別又有頭痛山在國西南鄉屬賓厯大
頭痛小頭痛之山赤土身熱之阪其葱嶺俗號極嶷山

其國衣服語貌與于闐相似書與婆羅門同人山居勁
健有音樂兵器有甲稍弓刀國法殺人劫賊者死餘罰
其稅雜輸之服飾婚姻同疏勒太武帝大延三年朝獻
於後不絕

鉢和

增後魏書曰鉢和在渴槃陀西其土尤寒人畜同居穴
地而處又有大雪山望若銀峰其人食麪服氈有二道
一道西行向噉噠一道西南趨烏菴為噉噠所統

波知

增後魏書曰波知國在鉢和西南土狹人貧依託山谷其王不能總攝有三池傳云大池有龍王次有龍婦小者龍子行人經之設祭始過不則多遇風雪

賒彌

增後魏書曰賒彌國在波知之南山居不信佛法專事諸神亦附噉東有鉢盧勒國路嶮緣鐵鎖而度下不見底熙平中遣使宋雲等竟不能達

烏菴

增北史曰烏菴在賒彌南北有葱嶺南至天竺婆羅門
為其上族婆羅門多解天文吉凶之數其主動則訪決
焉土多林果引水灌田豐稻麥寺埵華麗人有爭訟服
以藥曲者發狂直者無恙為法不殺犯罪惟徙之靈山
西南有檀特山山上立寺以驢數頭運食山下無人控
御自知往來

乾陀

增後魏書曰乾陀國在烏菴西本名業波為嚧唃所破
因改焉其王本敕勒臨國已二世矣好征戰與罽賓鬪
三年不罷人怨苦之有鬪象七百頭十人乘一象皆執
兵仗象鼻縛刀以戰所都城東南七里有佛塢高七十
丈周三百步即所謂雀離佛圖也

謝颺

增新唐書曰謝颺居吐火羅西南本曰漕矩吒唐顯慶
時謂訶達羅支武后改今號東距罽賓東北帆延皆四

百里南婆羅門西波斯北護時健其王居鶴悉那城七
千里多鬱金麗草國中有突厥罽賓吐火羅種人雜居
景雲初遣使朝貢後遂臣罽賓開元八年天子冊葛達
羅支頡利發誓屈爾為王至天寶中數朝貢

帆延

增文獻通考曰帆延者或曰望衍曰梵衍那居斯卑莫
運山之旁西北與護時健接東南距罽賓西南訶達羅
支與吐火羅連境地寒人穴居王治羅爛城有大城四

五水北流入烏許河貞觀初遣使入朝顯慶三年以羅
爛城為寫鳳都督府縛時城為悉萬州授王藹寫鳳州
都督管内五州諸軍事自是朝貢不絕

石汗那

增文獻通考曰石汗那或曰斫汗那自縛底野南入雪
山行四百里得帆延東臨烏許河多赤豹開元天寶中
一再朝獻

識匿

增文獻通考曰識匿或曰屍棄尼曰瑟匿東南直京師
九千里東五百里距葱嶺守捉所南三百里屬護密西
北五百里抵俱蜜初治若汗城後散居山谷有大谷五
酋長自為治謂之五識匿地二千里無五穀人喜攻剽
劫商賈唐貞觀二十年偕似沒役槃二國使者來朝開
元十二年授王布遮波資金吾衛大將軍似沒者北接
石土俗與康同役槃亦與康鄰出良馬俱蜜者治山中
在吐火羅東北南臨黑河其王突厥延陀種貞觀十六

年遣使者入朝開元中獻胡旋舞女護密者或曰達摩
悉鐵帝曰鑊品

劫國

增文獻通考曰劫國隋時聞焉在葱嶺中西與南俱與
賒彌國界接西北至挹怛國去長安萬二千里有戶數
萬氣候熱有稻麥粟豆羊馬出洛沙青黛唐武德二年
遣使貢寶帶金鎖玻璃水精杯各一頗梨四百九十枚
大者如棗小者如酸棗

陀羅伊羅

增杜氏通典曰陀羅伊羅隋時聞焉在烏荼國北大雪山坡上緣梯登山接七百梯方到其國

越底延

增文獻通考曰越底延國隋時聞焉治辛頭河北南至婆羅門國三千里西北至賒彌國千餘里東北至瓜州五千四百里其王婆羅門種戶數萬有弓矢刀鞘皮甲國法不殺人重罪流輕者杖國無課稅其俗事佛書同

婆羅門王及庶人被髮衣錦袍不開縫貧者衣白疊俗
清潔氣候溫多稻有羊馬多牛出鍤石訶黎勒石蜜麋
皮細疊

大月氏

原杜氏通典曰大月氏漢時通焉理藍氏城在大宛西
可二千里居媯水北其南則大夏西接安息四十九
日行北則康居去長安萬一千六百里不屬都護戶十
萬東去長史所居六千五百里其國本行國也隨畜移

徙與匈奴同俗控弦十餘萬故恃強輕匈奴本居燉煌
祁連間至冒頓單于攻月氏而老上單于殺月氏王以
其頭為飲器乃遠去過大宛西擊大夏而臣之都犂水
北為王庭其餘小衆不能去者保南山羌號小月氏

增後漢書曰月氏遷於大夏分其國為休密雙靡貴霜
盼頓都密凡五部匈奴後百餘歲貴霜匈奴攻滅四匈
侯自立為王國號貴霜侵安息滅僕達屬賓悉有其國
復滅天竺月氏自此富盛諸國稱之皆曰貴霜王漢本

其故號言大月氏云 北史曰北與蠕蠕接數為所侵
遂西遷都薄羅城後魏太武時其國人商販到京師自
云能鑄石為五色琉璃於是採礪鑄之既成光澤美於
西方來者乃詔為行殿容百餘人光色映徹觀者驚以
為神

小月氏

增後魏書曰小月氏治富樓沙城其王本大月氏王寄
多羅子也寄多羅為匈奴所逐西徙後令其子守此城

因號小月氏在波路西南先居西平張掖之間被服與羌同其俗以金銀錢為貨隨畜牧移徙類匈奴其城東十里有佛塢周三百五十步高八十丈自佛塢初建計至武定八年八百四十二年所謂百丈佛圖也 文獻通考曰晉天福時有仲雲旋居胡盧磧即其遺種

高附

增文獻通考曰高附後漢時通焉在大月氏西南亦大國也其俗似天竺而弱善賈販內富於財所屬無常天

三蜀賓安息三國強即得之弱即失之

御定淵鑑類函卷二百三十七

謹案卷二百三十七第十九頁前六行哈喇舊作
哈烈 又八行賽瑪爾堪舊作撒馬覺罕 又

後一行薩哈勒舊作沙哈魯又蘇勒坦作速魯

檀 又二行按都呼舊作俺都淮又巴喇勒哈

舊作八刺黑 二十六頁後五行額爾巴拉舊

作亦力把力 又八行揚德舊作養弟 又實喇

哈雅舊作沙鹿海牙 又達實哈舊作達失干

三十頁前一行德爾默舊作迭里迷 又六行

布哈爾舊作卜花兒 三十一頁後三行伊斯
帕罕舊作亦思把罕 三十二頁後四行伯實
巴里舊作別失八里 又七行哈達爾和卓舊
作黑的覺火者 又八行烏蘇舊作歪思又納
凱沙扎海舊作納黑失只罕今並改後倣此

謹案第四頁後三行大掠其邊刊本其邊訛而去

據唐書改

第四頁後七行立婆伽利為王刊本婆訛婁據唐


書改

第六頁後三行其王傳以相授刊本其訛玉據唐

書改

第十四頁前六行其國南界有火山刊本火訛大

據北史改



總校官庶吉士臣張能照

校對官編修臣朱攸

謄錄監生臣孟錫山